

Sehen/wissen vnd erkennen auch/was doch sey die grosse Schlange am
 Himmel/so fast einen ganzen Quadranten wo nicht mehr / einnehmen
 thut/auch was der Becher mit sieben Sternen auff ihr bedeute. Vnd
 was da wolle der Rabe/der sie mit seinem Schnabel zerhacket. Wir wis-
 sen vnd verstehen was vnd wer da seynd die beyden Hunde/canícula vnd
 alhabor oder Syrius,vnd was für Ungewitter der Syrius anrichten wer-
 de. Wir sehen mit offenen Augen/wer da sey der tapffere Held/vnd wa-
 ckere Jäger Orion/warumb er sich so tapffer heraus gepust/was für eine
 Jagt er anstellen/vnd was für Ungewitter er anrichten werde. Wir ver-
 stehen wer da sey der Ophiuchus vnd Schlangenträger/vnd warumb er
 den Scorpion mit Füßen zertrit. Wir wissen wer da sey Centaurus, wer
 lupus, caper, draco, ursus, &c. vnd was da sey der Nilus, &c. O solten die
 tapfferen Thaten vnseris Herculis, vnd was da sey clypeus, clava vnd re-
 lum Herculis, so wol Scutum, alles erzehlet werden/der verständige wür-
 de sich verwundern. Also auch die andern Bilder des Himmels/die
 haben alle ihre sonderliche Bedeutungen/vnd seynd in der Schrift zu
 befinden/solten diese dinge mit allen ihren Geheimnissen entdeckt wer-
 den/der Verständige würde sich verwundern/wie denn diese dinge in es-
 lichen Büchern von mir beschrieben werden/2c. Wer nun verstehet die
 Rede im Haggæo: Ich wil noch einmal bewegen Himmel vnd Erden/
 vnd wil die Stule der Königreiche der Heyden umbkehren / 2c. der wil
 vnd verstehet auch wann vnd zu welcher Zeit / die Kräfte der Himmel
 sich bewegen werden/vnd wenn alle diese dinge in vnserer neuen wunder-
 baren Astronomia werden geschehen vnd erfüllet werden: wie denn diese
 dinge/als nemlich die zeit solcher grossen gewaltigen dinge / auch gar
 vielfeltig am Himmel abgemahlet stehen/erst in 2. Triangulis, do in dem
 einen die Zahl 666. im andern die Zahl 42. magicè abgemahlet stehen/
 wer diese vberlegen kan/weiß alle vor angezeigte/vnd noch grössere dinge.
 Darnach seynd diese dinge noch viel auff andere wunderbare weise am
 Himmel abgemahlet/darvon in vnserer Astronomia, &c. Diese dinge
 hab ich also berühren/vnd dem Verständigen/insonderheit Euch/den
 Edlen/Gestrengen vnd Ehrenvesten/meinen großgünstigen Junctern
 vnd geneigten Förderern/mit wenigem zu verstehen geben sollen vnd wol-
 len/darmit sie vernehmen könten/das noch was höhers vnd vornehmers
 in Mathematischen Künsten/dann dieses Prognosticon / welches noch
 fast mit der alten Leyer vberinstimmt/sie künfftig zu gewarten/bitt ganz
 freundlich